

2021
AÑA DI RECUPERACION

2021

ISLA(●)NLINE

Diamars 10 Augustus 2021

Email: IslaOnline@gobierno.aw Tel: 528-4900

2021

AÑA DI RECUPERACION

ISLA ONLINE
NOTICIA DI GOBIERNO



GOBIERNO DI ARUBA



PROME MINISTER DI ARUBA

EVELYN WEVER-CROES



Prome Minister Evelyn Wever-Croes: Desde cu 12 mil vacuna a yega Aruba, E CANTIDAD DI PETICION PA VACUNA A REDOBLA



Den e ultimo siman, e cifranan di Covid 19 ta birando hopi halto na Aruba. For di e cifranan di e ola di Covid aki, ya por saca e siguiente conclusionnan;

1. E gran mayoria di esnan cu ta hayando Covid ta personanan cu no a vacuna.
2. E grupo di persona vacuna cu ta haya Covid, no ta bira hopi malo.
3. Masha poco persona vacuna cu ta haya Covid ta drenta Hospital.
4. Actualmente no tin niun persona vacuna cu tin Covid den cuida intensivo.

Esaki, Prome Minister Evelyn Wever-Croes a duna di conoce, ta un prueba cu e vacuna contra Covid ta hopi efectivo.

Mescos cu otro paisnan na mundo, na momento cu e casonan bay halto, esnan cu no a vacuna ainda, ta keda convenci pa tuma e vacuna. Awo na Aruba, mas di 800 persona ya a haci

un cita pa tuma e vacuna y lo ricibi e vacuna den e siguiente dianan nos dilanti. Aruba a ricibi mas di 12 mil vacuna. Esaki kiermeen cu actualmente tin hopi mas vacuna cu e peticion pa vacuna.

"Mi ta haci un apelacion na mayornan, pa nan hiba nan yiunan pa tuma e vacuna prome cu scol cuminsa bek pa nan no wordo perhudica den nan estudio si acaso nan haya Covid y mester bay den cuarentena of isolacion. Manera e conclusionnan cu a saca, e vacuna ta duna mas proteccion tanto na e hoben como e adulto contra efectonan pisa di e malesa aki.

E centro di vacunacion na Sta.Cruz, Centro Libertador Betico Croes (Sporthall) ta keda habri pa atende tur esnan cu kier tuma e vacuna. Laga nos probecha di esaki pa asina Aruba por recupera y prograsa", Prome Minister a expresa.

Prome Minister Evelyn Wever-Croes: PROME MINISTER TA FELICITA SR. GILLES PITMAN PA E BUNITA EDAD DI 100 AÑA

Un siglo di experiencia y conocimiento entrega na generacionnan

Celebracion di 100 aña, un siglo, un Centenario, na mundo henter ta un celebracion grandi y bunita. 100 aña di bida ta 100 aña di experiencia y di pasa conocimiento over na generacionnan. Pa yega na e edad magico aki, ta un bendicion. Celebracion di 100 aña di bida ta un celebracion maraviyoso di un bida bon biba. Y pa famia di Sr. Gilles Pitman, esaki tawata e sentimento.

Diaranson 4 di augustus 2021 sr Gilles Pitman a cumpli e bunita edad di 100 aña. Prome Minister Evelyn Wever-Croes a pasa felicita sr Gilles Pitman cu e edad respeta aki cumpli. Sr. Pitman y su casa, Sra. Nora a gradici y aprecia e bishita di nos Prome Minister na e ocasion special aki, rondona di famia y amistadnad kenda a bin hunto pa compania Sr. Gilles Pitman brinda pa su bunita edad di 100 aña.



Prome Minister Evelyn Wever-Croes:
Reunionnan di stakeholders en conexion cu formacion di
Gabinete Wever-Croes II

FORMACION DI UN GOBIERNO SOLIDO TA
UN PROCESO SERIO Y HOPI RESPONSABEL
CU TA TUMA SU TEMPO PA HACI'E BON
Esaki ta inspira confiansa den nos pueblo



Un siman nobo a habri cu yen di entusiasmo pa loke ta trata formacion di Gabinete Wever-Croes II. Dialuna 9 di augustus e reunionnan cu stakeholders den nos comunidad a sigui cu Formador Evelyn Wever-Croes y e ekiponan di Partidonan MEP y Raiz riba e tema di cu durante henter e temporada aki a haya mas atencion, esta enseñansa. Na final di cada reunion, representantenan a duna declaracion na prensa pa asina e informacion di con e reunionnan a bay yega na nos pueblo. E instancianan cu a reuni cu Formador dialuna ta: Instituto Pedagogico Arubano (IPA); Stichting Avondonderwijs Aruba; Fundacion Orguyo Aruba; Fundacion Enseñansa pa Aruba (FEPA) y Openbare Avondleergangen Aruba (OAA).

Un biaha mas nos por mira tras na un dia fructifero di reunionnan hopi informativo y interesante na unda e enfoka un biaha mas tawata enseñansa na unda hopi tema a wordo trata cu lo haya e debido atencion. Algun tema mester wordo atendi cu hopi urgencia y otronan e minister encarga lo atende cu nan, segun Prome Minister Evelyn Wever-Croes.

"Diabierna ultimo durante mi audiencia cu Gobernador di Aruba, mi a haya tres siman mas pa finalisa e parti di formacion di Gabinete Wever-Croes II y nos ta enfoca riba esaki pa asina



nos keda cla rond di e fecha acorda. Hopi hende ta di opinion cu formacion di e gobierno nobo ta durando hopi. Si nos realisa, na 2017, a dura 2 luna prome cu a forma Gabinete Wever-Croes I. Na Corsou a dura tres luna prome cu a forma gobierno y na Hulanda a cuminsa cu formacion desde maart y ainda esaki ta andando. Esaki ta pasobra formacion di un gobierno solido y responsabel ta un proceso serio y hopi responsabel cu ta tuma su tempo pa haci'e bon pa asina e por inspira confiansa den nos pueblo", Prome Minister Evelyn Wever-Croes a duna di conoce.

Continuacion FORMACION DI UN GOBIERNO SOLIDO....



Prome Minister Evelyn Wever-Croes:

Reunionnan di stakeholders en conexion cu formacion di Gabinete Wever-Croes II

Formacion ta un proceso serio cu tin tur responsabilidad

MESTER TUMA TEMPO PA HACI'E PA NOS

TA SIGUR CU NOS TA HACI'E BON



Pa e reunionnan cu Stakeholders pa diamars 10 di augustus, a reuni cu 4 instancia den cuadro cu formacion di Gabinete Wever-Croes II. "Formacion ta un proceso serio cu tin tur responsabilidad y mester tuma tempo pa haci'e pa nos ta sigur cu nos ta haci'e bon", Prome Minister Evelyn Wever-Croes un biaha mas a enfatisa durante e conferencia di prensa pa duna informacion di con e reunionnan ta bayendo.

Den e cuadro aki pa finalisa e acuerdo di gobernacion, Formador Wever-Croes hunto cu Ursell Arends di Partido Ruiz y representantenan di cada Partido, ta reuniendo cu stakeholders riba diferente area. Te cu diamars a reuni cu 86 stakeholders total. Otro siman lo continua cu algun mas pa asina por rond af e parti aki tambe.

Fundacion Pa Nos Comunidad, ta un di e stakeholdernan cu ta importante den e combatimento di pobreza na Aruba. Fundacion Pa Nos Comunidad ya ta existi pa basta aña y ta conoci como e fundacion cu ta yuda e hendenan cu pakete di cuminda, cu muebles pa cas si ta necesario y ta yuda hende

pa para bek riba nan pia.

"Despues di e pandemia e fundacion aki a hafia un papel diferente y aworaki e ta e instancia na Aruba cu ta yudando cu e paketenan di cuminda y tabata hopi importante pa nos a reuni cu nan. Sigur un bon reunion na unda nos a compronde con e vision y strategia ta y cua ta e necesidadnan cu nan tin y esaki nos lo tene cuenta cu ne den e documentonan pa cu formacion", Prome Minister a duna di conoce.

Stichting Monumentenfonds Aruba cu ta e fundacion cu ta encarga cu e proteccion di e monumentonan di gobierno of priva. E fundacion ta yuda convence e personanan priva of companianan cu ta doño di monumentonan con nan por conserva un edificio y haciele un monument. Tin diferente beneficio ora cu un edificio wordo considera un monument manera beneficio di belasting, beneficio cu e bator ta bira mas halto, y e ta algo cu gobierno no por haci su so pesey e strategia aki. Nan a trece dilanti tambe diferente proyectonan cu tin andando.

Continuacion MESTER TUMA TEMPO PA HACI'E

Insurance Association of Aruba, IAA cu ta e asociacion cu e companianan di seguro na Aruba. Un reunion hopi fructifero ya cu nan a trece hopi punto nobo padilanti y a vocifera nan interes pa sinta cu AZV y Gobierno pa mira con nan lo por yena e bashi di paketenan di seguro via seguronan adicional y priva riba cuida medico. A toca e tema di e ley di pensioen obligatorio y e falta di control cu tin riba esaki y kico nan rol ta. Tambe a papia di e problematica di tin demasiado auto ta core rond sin seguro di auto y con por yega na un miho control pa cuerpo policial y departamento di impuesto pa sigura cu e autonan riba caminda ta sigura pa evita problema y gastonan cu un persona sin seguro por haya si e haya accidente riba caminda.

Finalmente a sinta cu Aruba Financial Center Association (AFCA). Nan a trece dilanti e retonan cu tin pa cu e industria di offshore, industria financiero akinan na Aruba. nan a confirma cu e invitacion na e reunionnan aki a duna nan mas animo pa duna un contribucion activo y a palabra cu lo tin un siguiente reunion na september na unda cu nan por bin cu proposicionnan mas concreto.

Na final di e reunionnan di 45 minuut, representantenan di cada instancia a duna nan declaracion na prensa pa asina prensa tambe por tin idea di con e reunionnan ta bayendo y informa nos pueblo tambe. Esnan cu a hiba duna declaracion na prensa tawata: Sra. Carolina Hart di Fundacion Pa Nos Comunidad, FPNC. Sra. Anne Witsenburg, Director Stichting Monumentenfonds Aruba. Sra. Angeline Tromp Insurance Association Aruba y Sr Stanley Looman di Aruba Financial Center Association, AFCA.





Minister Xiomara Maduro ta informa:

MELDPUNT ONGEBRUIKELIJKE

TRANSACTIES (MOT) A CAMBIA DI NOMBER

Y TA YAMA AWOR FINANCIAL INTELLIGENCE

UNIT OF ARUBA (FIU-ARUBA)

Ademas a haya un logo nobo y a renoba e website

www.fiu-aruba.aw

E organisacion Meldpunt Ongebruikelijke Transacties (MOT) ta un di e instancianan principal den e cadena pa preveni y combati labamento di placa y financiamiento di terrorismo. Minister Maduro ta enfatisa cu MOT ta funciona y opera na manera autonomo y independiente y ta keda pafo di influencianan politico.

Cambio di nomber di MOT

E mandatario ta informa cu MOT e aña aki ta cumpli 25 aña di existencia y ta yama awor Financial Intelligence Unit of Aruba (FIU-Aruba). Pronto Parlamento di Aruba lo trata e ley pa e nomber nobo bira oficial. E nomber nobo ta na ingles pa asina e organisacion por wordo reconoci riba e plataforma internacional, como e entidad cu ta responsabel pa colecta y analisa transaccionan inusual na Aruba, cu lo por tin di haber cu labamento di placa of financiamiento di terrorismo.

Logo nobo

Hunto cu e nomber nobo a disefia tambe un logo moderno cu ta consisti di dos flecha cruzando den otro, reflehando e direccion y fluho di transaccionan financiero. E flechanan ta den tres color, cada un ta tipifica e indole di e transaccion. E color blauw ta nifica e confianza, dignidad, inteligencia, autoridad y ta simbolisa un transaccion confiabel. E color shinishi ta indica un transaccion dudoso. E color cora ta pidi atencion, manera un 'red flag', na un transaccion inusual.

Por tuma nota tambe cu e nomber di e institucion, ta wordo skirbi cu letterman den un estilo fini, indicando cu e institucion ta opera 'low profile', pa por cumpli cu su tarea y responsabilidad manera ta anca den ley.



www.fiu-aruba.aw

E website renoba di FIU-Aruba ta na e idioma ingles pa facilita tur esnan cu ta interesa den nos Pais y e entidadnan financiero y no-financiero cu tin un tarea specifico pa duna contenido na e Ordenanza pa Prevencion y Combatimento di Labamento di Placa y Financiamiento di Terrorismo (LWTF), cu informacion relevante y importante. E website ta inclui tambe e ultimo desaroyonan y sancionan internacional tocante labamento di placa y financiamiento di terrorismo.

Gradicimento

Minister Maduro ta gradici e profesionalnan cu a traha diligentemente riba e proyecto di e nomber y logo nobo y tambe riba e website renoba di FIU-Aruba.



GOBIERNO DI ARUBA

Pabien

212 aña di e prome grito di
INDEPENDENCIA
ECUADOR



10
AUG
2021



MINISTER ANDIN BIKKER A ENTREGA EKIPONAN NOBO NA CUERPO DI BOMBERO



Recientemente Minister mr. Andin Bikker a completa entrega di un cargamento grandi di material di trabou na Cuerpo di Bombero. Ta trata aki di entre otro tanki- y mascaranan di oxigeno nobo, ekipo specialisa pa yena y mantene esakinan, camaranan infrared specialisa pa detecta victima memey di huma y candela, y unidadnan moderno di comunicacion pa por manda señal pa bomberonan den un candela of sitio di desgracia. E tankinan di oxigeno ta material cu no a haya e debido atencion bou di e gobierno anterior, ya desde 2013 Cuerpo di Bombero tabata pidi atencion pa haya reemplazo di e materialnan aki.

No obstante e retonan di e pandemia y e situacion financiero di nos pais, e Gabinete actual a logra riba proposicion di Minister Bikker pa aloca fondonan pa por a manda bestel tur e material cual ta esencial pa e trabou di Departamento di Bombero.


Entre e ekiponan nobo tin como 80 set di ekipo personal pa uzo di e bomberonan, cu ta consisti di mask- y tankinan nobo di oxigeno pa bombero bisti durante candela. Nan tabata uza e tankinan bieu cu pues ya desde 2013 bin ariba tabata rekeri

hopi mantencion y cada bes tabata crea retonan adicional pa e Cuerpo di Bombero por eherce nan trabou debidamente. Tambe bomberonan tabata keha cu e aire den e tankinan bieu tabata caba hopi lihe, locual ta stroba nan di traha den un candela. Cu e tankinan nobo por keda como 1/3 parti mas di tempo combatiendo un candela, cual ta un adelanto enorme. Cu adkision di mask-, tankinan nobo, ekipo nobo specialisa pa yena y mantene esakinan, e camaranan infrared y sistema di comunicacion nobo, sin duda lo garantiza un funcionamiento mas eficiente y ta eleva e seguridad pa e bomberonan.


Sindicato SINBA a gradici e mandatario pa a logra busca tur e ekiponan nobo cu a yega Aruba y cu awor ta bay den uzo na e Cuerpo di Bombero. Nan a keda contento cu Minister Bikker y Gabinete Wever-Croes si a duna oido na nan peticion pa material di trabou nobo y a cumpli.

E mandatario a yama e bomberonan pabien cu e ekiponan nobo aki y a informa cu lo sigui adelanta trabou riba otro temanan di ekipo di trabou pendiente y a desea nan hopi exito y forsa den nan trabou diario.

Continuacion MINISTER ANDIN BIKKER A ENTREGA EKIPONAN NOBO....



Gobierno Di Aruba: FALTA DI CONFIANSA DEN DIRECTORNAN DI WEB A CONDUCI NA E RETIRO LO BUSCA UN DIRECTOR NOBO PA WEB CU SALARIO DENTRO DI WEVER-CROES NORM



Varios fraccion den Parlamento siman pasa a dirigi preguntanan na Gobierno di Aruba riba e retiro di directornan na WEB. Oficina di Prome Minister a ricibi carta di fraccion di MEP, RAIZ, Accion 21 y di sindicato SIMAR. Contrario na loke tabata wordo bisa, e fraccionnan aki no a pidi reunion den Parlamento pa trata e tema. Haciendo uzo di e derecho di cada Parlamentario, a base di nos constitucion, nan a dirigi pregunta por escrito pa Gobierno y cu e peticion pa Gobierno contesta nan por escrito. A base di informacion obteni di Utilities Aruba, a contesta cada carta extensamente dialuna ultimo.

Segun e informacion cu Gobierno a duna Parlamento, tur cos a cuminsa cu falta di confianza den e directornan, debi na varios motibo conoci na e dos directornan y algun di e motibonan aki a ser comunica den e contestacion indica den e parafo anterior. Ambos director a wordo informa di esaki, cu un invitacion pa un reunion cu accionista di WEB, Utilities Aruba NV. Mientras tanto a bin un otro motibo mas acerca, ora a bira conoci cu directiva di WEB – contra di instruccion di accionista y contrario di e sentencia di maart 2021 unda WEB a gana su caso referente e recorte – a duna empleadonan un compensacion di e recorte di salario di 12.6%. Esaki, manera ta conoci, tabata un exigencia di Hufanda pa por duna Aruba sosten di likides. E accionista di WEB a informa e directornan cu lo tene nan responsabel pa esaki tambe.

Despues e directornan a haci un proposicion pa yega na un acuerdo pa termina nan contract, a base di nan contract

laboral cu a wordo firma e tempo ey pa sr. Frank Hoeverts, director e tempo ey di Utilities Aruba. Despues di negociacion, partidonan a yega na un suma mucho mas abou cu esun stipula den e contrato laboral. Partidonan a palabra cu lo no duna informacion riba e suma acorda. E accionista di WEB, Utilities, a busca conseho cerca dos diferente oficina di abogado, y ambos a conseha pa yega na un acuerdo cu e directornan pa motibo cu bringa e caso den Corte ta trece hopi mas gasto cu n'e y ta tuma tempo.

Den su contestacion, Gobierno a splica cu segun Statuut di WEB, pa evita un bashi den liderazgo di WEB, temporalmente e hunta di comisario di WEB a apunta e presidente di hunta di comisario pa asumi tareanan di directiva di WEB. Un di su prome tareanan lo ta pa busca un director nobo. Lo publica e vacatura y e proceso lo ta uno obhetivo y independiente, basa riba Corporate Governance Code, mescos cu a tuma luga e.o. den caso di Elmar. Lo busca un director en bes di dos y su salario lo ta den cuadro di e Wever-Croes-norm. Tur esaki lo baha gasto.

Ademas, fraccionnan di MEP y Accion 21 a haci varios pregunta tambe con por garantisar suministro di coriente, ki plannan tin pa cu energia removable y cambio di structura di Corporate Governance. Gobierno a splica extensamente kico e plannan ta. Den un siguiente comunicado lo duna mas informacion tocante di esakinan.

CONSENSO RIBA PROPOSICION DI LEY PA LEY DI REINO ORGANO CARIBENSE PA REFORMA Y DESAROYO



Hulanda, Aruba, Corsou y Sint Maarten a yega na un acuerdo riba introduccion di e proposicion di ley pa e Ley di Reino Organo Caribense pa reforma y desaroyo (COHO). Den e lunanan cu a transcuri a tuma luga diferente ronda di combersacion entre e partidonan tocante e consehonan di Raad van State y di Raden van Advies Caribense. E combersacionnan a bay den bon esfera y tabata constructivo. Finalmente a logra yega na consenso.

Secretario di Estado Raymond Knops: 'E lunanan cu a transcuri, nos como pais den Reino a hiba combersacion intensivo y a negocia fuertemente. Mi ta contento cu awor nos ta di acuerdo cu otro riba e proposicion di ley, cu lo percura pa aumenta resistencia financiero economico di Aruba, Corsou y Sint Maarten. E ta e fundeshi bou di e cooperacion pa termino largo cu nos a palabra cu otro.'

Minister-president di Aruba, Evelyn Wever-Croes: 'E periodo tras di lomba tabata dificil, pero nos a siña hopi di dje. Como pais nos a sinta cu conviccion na mesa di negociacion pa asina crea e miho resultado pa nos ciudadanonan. Nos institutonan tabata esencial den esaki. Nos dilanti nos tin un ley den concepto cu cua nos, como pais den reino, por demonstra cu respet mutuo, colaboracion y resiliencia ta e base di nos Reino.'

Minister-president di Sint Maarten, Silveria Jacobs: 'Gobierno di Sint Maarten ta contento cu a realisa e ahustacion necesario pa e presupuesto di Consensus Koninkrijkswet. Durante di e ultimo cuater simannan, tabatin hopi discusion y colaboracion pa yega na e punto aki. Sint Maarten ta spera cu por fortalece e relacion entre e partnernan di Reino aun mas tanto.'

Minister-president di Corsou, Gilmar Pisas: 'Mi kier expresa mi agradecimento na e ekiponan di empleadonan publico, cu a base di consehonan di Raad van State y e Raden van Advies, a adapta e proposicion di e rijkswet di tal forma cu e proposicion ta hustifica nos autonomia y cu ta brinda miho perspectiva financiero y social na e pueblo. E pueblo ta na prome luga cerca nos. Nos lo laga evalua e proposicion di ley ahusta un

biaha mas door di nos Raad van Advies y despues Parlamento tambe lo trata e contenido. Cu continuacion di e reformanan y reahuste di un economia cu ta krimp, nos ta spera cu pronto e efectonan lo ta visibel pa e pueblo.

E palabracionnan

Basa riba conseho di Raad van State di Reino y Raden van Advies y combersacionnan entre e partidonan, a haci algun ahuste den e proposicion di ley.

Competencianan di COHO

Den e proposicion di ley ta amplia responsabilidad di e paisnan riba e reformanan. Por ehempel nan ta responsabel pa formulacion y stipulacion di e plannan di accion. E competencianan di COHO ta limita na dunamento di sosten na y supervision di e reformanan. Ademas lo envolve e paisnan ora di formulacion di e reglanan di maneho di COHO.

Rol di ministerio di BZK

E rol di ministerio di BZK ta enfoca riba e agenda di ehecucion cu COHO ta stel op conhuntamente cu e paisnan. BZK por duna instruccion na COHO ora tin indicacion cu ta traspasa e limitenan di e pakete di pais cu e agenda di ehecucion. Lo anda cautelosamente cu e competencia aki.

Supervision financiero y fianza

Den e proposicion di ley adapta ta reemplasa e supervision financiero agudisa cu un evaluacion di presupuesto cu e College (Aruba) Financieel Toezicht ta ehecuta. E colegio ta verifica si e actividadnan concreto den e agenda di ehecucion a keda traduci di forma responsabel den e presupuesto. Banda di esey ta verifica si den e presupuesto tin elemento cu ta forma barera pa e pakete di pais. COHO no ta supervisa esakinan, esey e supervisor financiero ta haci via un supervision presupuestario existente mas amplio.

Nombramento di miembronan di directiva

Pa constelacion y nombramento di directiva di COHO a yega na un compromiso, den cua tur e paisnan por haya nan mes. Di e tres miembronan di e directiva por lo menos dos miembro, entre nan e presidente, tin afinidad demostrabel cu e paisnan Caribense den Reino. Banda di e criterionan di nombramento a yega na un acuerdo tambe tocante e procedura di nombramento, caminda e paisnan ta forma e comision di conseho di nombramento.

E proceso

E proposicion di ley cu partidonan a yega na un compromiso, ademas lo ser discuti riba 3 di september den Consejo di Minister di Reino. Despues cu Consejo di Minister di Reino acorda esaki, por entrega e proposicion na Tweede Kamer y Parlamento di Aruba, Corsou y Sint Maarten. Na e momento ey e proposicion di ley ta bira publico.

PROTEHA BO MES. PROTEHA OTRONAN!



DESDE 7 AUGUSTUS 2021

**UZO DI
TAPABOCA**

**TA OBLIGATORIO
PADEN DI TUR ESTABLECIMENTO!**

Departamento di Salud Publico:

UPDATE 10 DI AUGUSTUS 2021

Segun resumen di awe 36 persona a recupera y un total di 107 caso nobo di COVID-19 a keda registra cual 10 ta turista y 97 ta residente. E cifranan aki ta representa un 'Positivity rate' bou di nos residentenan di 30%.

Cantidad di casonan activo di COVID-19 pa awe ta 874 y cantidad di fayecidonan relaciona cu COVID-19 ta 111.

Datos ta ilustra subida continuo di casonan nobo cu un average semanal di 106 caso pa dia y un average di 'positivity rate' semanal di 32% pa dia cu ta sigui subi.

Hospital tin 36 persona interna di cual 6 ta den ICU, 28 riba piso general y 2 riba piso di maternidad. Datos di hospital ta ilustra cu di e 36 personanan ingresa cu COVID, 4 ta no-AZV dus ta turista of ilegal, 8 ta vacuna y 24 no ta vacuna.

10/8/2021	TOTAL	RESIDENTE	NO-RESIDENTE
Casonan Nobo	107	97	10
Activo	874	803	71
Recupera	11651	10585	1066
Positivo	12636	11497	1139
Morto	111	109	2

Keda semper
POSITIVO
ta un di e miho
remedinan pa ta
SALUDABEL

UN SIMAN
NOBO
PA NOS TA
Positivo

DVG
THE GOVERNMENT



Un Feliz Dia

GABINETE WEVER-CROES

ISLA ONLINE
NOTICIA DI GOBIERNO